



杭州府志  
(乾隆)  
二七

杭州府志卷一百四十一

人物七 義行一

晉

孫拯字顯世富春人能屬文仕吳爲黃門郎孫皓世侍臣多得罪拯以智全吳平後爲涿令有稱績成都王穎以陸機參大將軍軍事表爲平原內史太安初穎與河間王顥起兵討長沙王乂假機後將軍河北大都督拯爲司馬陸機旣爲宦人孟玖等所誣收拯考掠兩踝骨見終不變詞門生費慈宰意二人詣獄明拯拯譬遣之曰吾義不可誣枉知故卿何宜復爾二人曰僕亦安得負君拯遂死獄中而慈意亦死

晉書陸機傳

宋

范叔孫錢塘人少仁厚周窮濟急同里范法先兄弟七人同時疫死唯餘法先病又危篤喪尸經日不收叔孫悉備棺器親爲殯埋又同里施淵夫疾病父母死不殯范苗父子竝亡范敬宗家口六人俱得病二人喪沒親鄰畏遠莫敢營視叔孫竝爲殯葬躬卹病者竝皆得全鄉曲貴其義行莫有呼其名者宋孝武孝建初除竟陵王國中軍將軍不就

宋書南史  
孝義傳

梁

范元琰字伯珪錢塘人父靈瑜居憂毀卒元琰時童孺哀慕盡禮親黨異之及長好學博通經史兼精佛義家貧唯以園蔬爲業嘗

偶出行見人盜其崧元琰遽退走母問其故具以實答母問盜者爲誰答曰向所以退畏其媿恥今啟其名願不泄也於是母子秘之或有涉溝盜其筍者元琰因伐木爲橋以渡之自是盜者大慙一鄉無復草竊居常不出城市獨坐如對嚴賓見者莫不改容正色卒年七十

梁書處士傳  
南史隱逸傳

後梁

褚雅字元道錢唐人梁末隱句曲山中輕財重施拯物無厭營田若熟以乞貧者與人共居常早起灑掃取水徧以周給覓樵薪乞人夏月種瓜恣啜者來取行之終身如一日

茅山志

吳越

九

義行一

二二

張儼餘杭人好學有賢德不樂榮利嘗開圃種匏以所買錢造橋

俗謂葫蘆橋

咸淳志

宋

焦中山鹽官人素好義自雍熙四年尸祝許睢陽至天聖九年遂捨地祠張許並塑其象時王可回曰中山一邑義士因名其坊曰

忠義

海甯縣志

王復錢唐人多伎能而醫尤精期於活人不志於利築室候潮門外治園圃作亭榭與賢士大夫遊惟恐不及然終無所求蘇軾嘗云人徒知其接花秬果之勤而不知其所種者德也乃以種德名

其亭而遺以詩

咸淳志

俞舉善錢唐人累世同居號義門明道二年旌表門閭咸淳志

葉曙字杲卿錢唐人授桂州司法家故饒財諸弟盡用之而求異籍曙喟然曰家事至此絲吾祿不足以聚親族耳汝曹何咎有吳謚爲象州武化令而死其妻挈二女歸閩至桂而妻又死曙爲置地合窆之哀其二女無歸娶爲二子婦兩浙名賢錄浙江通志

何押錄餘杭縣吏佚其名自壯歲爲小胥馴至押錄持心近恕略無過愆前後縣宰深所倚信兼領開拆每受訟牒坐於門一一取閱有挾詐姦欺者以忠言反覆勸曉之曰公門不可入所陳旣失實空自貽悔何益也聽其言去者甚衆民犯罪麗於徒刑合解府問顧其情理非重必委曲白宰就縣斷治其當杖者又往往諫之

使寬嘗置二竹筒於堂時擲三兩錢或一錢於筒中諸子竟不深  
曉迨謝役壽終始告之曰吾免一人徒罪則投一光錢於左筒免  
一杖罪及諭解一訟則投一糙錢於右筒剖之皆充滿無餘地遂  
卒後十年子鑄登政和五年進士紹興中位至執政累贈其父太

子少師

夷堅志

呂思恭字禮夫錢唐人幼失父事母色養無所不至積官至修武  
郎與人交務施而不責報人以匱告多輟己所有畀之有所予惟  
恐他人知人或負之輒自責曰某事似有愧宜得此行孚於人翁  
然無間及卒中外聞見咸痛如至親廢卒二百相弔曰捐當取之  
金以惠其下惟公里閭相告語嘗起母病折券以利我城東民相

謂甲辰之役吾輩不腐齒公實生我其懿德如此

陳造撰墓志

蔣崇仁郡人居興德坊喜賑施每秋成儲穀如原直售之且聽糴者自量或捐與飢者終時屬二弟崇義崇信力行善事里人德而

祀之

西溪梵隱志

元

應普字德施錢塘人宋德祐時官武進校尉至元間凡有仕籍者往往持故告身詣京師乞換授普獨晦匿不肯自言峩冠大帮逍遙城市中日以教子弟接賓客為事閭巷細人無以自業者時貸以錢而不責其息人多德之

黃潛撰墓志

范思明錢塘人為世醫仁厚存心信誼及物岳東伯之子患疹危

天且霖雨致思明療之輒苦雨思明不以雨辭至則衣帽霑濡無  
難色兒賴其醫而瘳東伯德之徵言徐一夔以報爲作述德一篇  
亦述其兄思賢之療其子十里許戴笠披毳跨款段往一劑而愈  
思賢既復姓名爲吳觀善隱東皋而思明爲范氏世醫今貢院西  
有范郎中巷卽其故居

武林文  
獻志

朱慶宗杭人捐田二百七十有五畝歸西湖書院著令減其租什  
二實爲米一百三十有二石請別儲之以待書庫之用毋移他費  
凡書板之剝缺者補治之外誤者刊正之未備者增益之宋刻經  
史羣書書庫官掌之者皆完其舊

黃潛撰西湖  
書院田記

何敬德杭人時稱何長者大德十一年大飢官設粥仙林寺飢民

多殍敬德約同志五六人卽菩提寺設粥夜置大甕明日飢民至  
先後列堂廡下或溢出門外道上相向坐虛其前以行粥用兩人  
界一人執杓注器食已以次去日煮米七八石至十石始六月至  
八月飢民無死者石塘胡長孺曰往歲湖州作糜食飢糜脫釜猶  
沸人亟得食食已輒仆百步閒長者預貯大甕蓋懲湖州事也

蓉塘

詩話

孫子耕杭人與新城豪民駱長官爲友元統間駱犯罪流奴兒干  
子耕送至肇州而回交誼如此不減古人

楊瑞山  
居新話

羅世榮字國器錢塘人後至元二年爲行金玉府副總管有匠者  
慢工案具而恕之同僚詢其故世榮曰吾聞其新娶若撻之其舅

姑必以婦為不利口舌之餘則有不測之事存焉姑寬之眾仰其

用心之仁 山居新話

周綬字廷章餘杭人年十七父歿理家事踰於老成蠲逋負卹困

窮內外咸稱美之至正初天下大亂盜賊蜂起綬世居免函居民

扶老攜幼避去家人亦將作裝綬毅然曰吾先人墳墓在是避將

安之汝輩自去吾當死守眾感而止遂散家貲募鄉里少壯為團

結義保之法民始有固志 續餘杭縣志

凌善之號草庭新城人元季隱居不仕讀書飲酒嘯傲自若至正

間歲大饑乃傾資煮粥以濟貧餒人有逋負悉焚其券鄉人德之

康熙志

王一山杭人世業儒杭有巨室怙財挾勢虐害良善有司莫敢誰  
何衆訴憲府巨室逃匿憲使怒示揭隱藏者罪連坐首捕者賞萬  
緡一山其友藏彼於密朞月不發鄰家報官搜索得之併逮繫一  
山囚見憲使問之曰朋友顛連來奔乘其危以售之則名教中有  
所不容某誠弗忍爲事覺連坐乃甘心焉使悚然曰君子所謂臨  
難毋苟免其人踐之矣眞義士也若加以罪是吾政苛而刑濫民  
何以勸遂釋之

輟耕錄

賈銘字文鼎海甯人元季以貲雄海上爲萬戶長性好客能拯人  
之急有劇孟郭解風一詩名士如胡隆成鮑恂輩咸歸之劉基未  
遇時亦客其家銘壽百有六歲子執中承父志建義塾於家奉先

聖象配列諸賢後立講堂祠從祀主備禮器倉庾庖湏所儲經史  
百家言割贍田八百畝聘名師教邑子弟鄰郡士聞風而來相與  
講義至正十八年事聞授執中山長劉基爲撰義塾序弟用中捨  
田百畝入儒學州牧上其事於郡先是州人士未有與計偕者至  
正十九年用中二子祥麟祥鳳俱中式

萬曆志海  
甯縣志

馬宣教佚其名以行稱萬十一其先汴人宋靖康閒扈從南遷徙  
居鹽官黃灣里煮海致富值歲祲羣溷丁將散去宣教出粟賑貸  
猶不贍變產殖以活之已而家益饒輿黃岡賈氏兄弟竝以貲甲  
一郡復起樓聚書萬卷延徐一夔貝瓊諸名儒教其子弟亦同賈  
氏義塾云時元末兵起張士誠據吳方國珍據越所在殘破而靈

泉一鄉獨全則宣教保障之功居多

海甯縣志

何宗實其先由東平徙杭遂爲杭人仁孝慈愛所得俸奉母外以  
覃於族兄宗茂同居無間言妹適戴氏戴沒給養其家子女爲之  
嫁娶鄰婦有哭甚哀者問之喪其良人貧無以治棺卽賻之他日  
婦至請傭以償值曰周汝急豈望報乎婦謝而去

楊維楨撰墓志

朱景仁海甯人事父母以孝聞有異母兄二事之甚恭同居共爨  
待宗族外嫻皆有恩篤交遊元季四方衣冠之士避地海甯者景  
仁悉解衣推食與同甘苦屢徵不就自號貞白道人

兩浙名賢錄

周天祐杭人居家以孝聞產頗饒推恩宗族殯無歸者五喪嫁甥  
女之貧而孤者薦授崇德州倅不赴築室漁溪之上耕釣自適或

里中有爭者輒喻解之人爲無訟

貝瓊撰  
墓志

夏應祥錢塘人元置行諸路總管府於杭治百工之事應祥用薦爲府屬雜造局大使改金玉局大使旋升軍器局提舉司同提舉端重詳慎處鄉黨一以謙抑自持性不嗜烹宰家故饒財未嘗以口腹之欲傷物命或會親友取具於市庖人至不煩操刀見人飢寒尤矜恤之所督局工或內府需工急晝夜併作輒戒僮僕爲飲食餉之平生切於濟人利物素習岐黃書譜和劑法乃聚藥材按古方書製丸散開壽安堂藥室於郡城壽安坊貧者則施予之又以藥材之不易致者一藥或價值百金世醫往往以近似者代坐是多弗效應祥恆以爲病故居藥不計價值至藥性溫涼君臣佐

使必躬爲斟酌等分而成劑其言曰此人命所繫不可忽也垂歿猶戒其子勿輕藥事子仁壽遵遺命捐重貲購良藥致藥尤富川委山積病家非夏氏藥不用仁壽自號壽安處士在鄉黨謙抑如其父有弗給者不俟其請解推不吝里有以大宅一質錢者直與屋等久之不能贖請以屋歸之乃厚其直立券以購或曰太贏仁壽曰乘約以規利吾不爲也

徐一夔撰墓志

陳振字文舉其先河南杞縣人宋南渡居錢塘父益中饒於財月給諸子錢爲日用費振獨市書博觀約守務實踐不爲虛譽年二十以詩經中鄉舉爲蘇州文學掾至正兵亂避居弁山遂家焉雖流離顛沛不廢問學性端謹妻蔣氏厄於兵難赴水死義不再娶